

UKWỌRỌ-İKỌ PAUL KE OBOT MARS

Utom Mme Apostle 17:1-34

ỌYỌHỌ UKPEP ̄NKPỌ 335

Eke Mkparawa

İKỌ IBUOT: “Nnyin idudu ke Enye, inyuñ isaña ke Enye, inyuñ inyene uwem nnyin ke Enye” (Utom Mme Apostle 17:28).

Ndikwọrọ Eti-mbuk

Paul ye Silas ikokopke mmemidem okposuk edi nte ukọbọ okosimde mmọ. Ini kiet efen mmọ ema eda etop erinyaña eka ke obio efen. Ke akamba obio Thessalonica, mmọ ema ekut Ebiet-ukpono mme Jew kiet, mi ke Paul ekenyene ifet ndikwọrọ ikọ Abasi. Ediwak mbio Greek, iren ye iban, ema enim mme ikọ emi Paul eketiñde ọnọ mmọ ke abaña ndutuhọ Christ ye eriset ke mkpa Esie ke akpanikọ.

Ntre nko, ekese mme Jew ema efube-ufup sia ediwak owo ema ekekpañ utọñ enọ Paul. Usen kiet otu mbon ndutime ema enam mfina ke Obio eyom Paul ye Silas. Mmọ ekekere ete ke mme ọkwọrọ-ikọ Abasi emi ekedu ke ufọk Jason, edi sia mikekwe mmọ do, mmọ emum Jason eka ke iso mbon obio. Mme asua akpanikọ emi ema efiori ete “Mme anditimere ererimbot emi edi mi nko-o” (Utom Mme Apostle 17:6). Mmọ ema etiñ enọ mbọñ ete ke Paul ye Silas ekekwoọrọ ebaña Edidem Jesus. Emi ama afina mme mbọñ oro eti-eti, edi ke akpatre ema eyak Jason ọnyọñ. Nte etiede, mme ufan Paul ema enam ekikere ete ke ọfọn enye ndikpọñ obio man ọbọhọ mfina. Ke okoneyo, Paul ye Silas ema enam isañ eka ke Berea, ebiet emi ekekarade mmo, do nko mmọ etiñ enọ ediwak owo ebaña Jesus.

Ke ini ndiọi mme Jew emi edude ke Thessalonica ekopde ete ke Paul ye Silas ke ekwoọrọ ikọ-Abasi ke Berea, mmọ esọsọp eka do ndinam mbio obio ebumere esin ntime. Etie nte satan isikopke uyuhọ tutu enye anam kpukpru se ekemedede nditre utom Abasi. Kpa ye oro, ema etọ ikọ Abasi ke mme obio emi, nko, kpa nte ekpri mkpasip emi etode ke isọñ, enye eyetibe ọwoọrọ onyuñ ọkọri onyuñ oñwum mfri ke ebiet eke esit ọbiọñ odude.

Ke Athens

Paul ama aka ke akamba obio Athens, Greece, do ke ekebet Silas ye Timothy ndisobo ye enye. Paul ikabiatke ini emi ke ikpikpu, okposuk edi; kpa nte etiede mfin emi, nditọ Abasi ke enanam nkpọ enọ Ọbọñ. Nte enye asañade akanare obio esit ofiop enye ndikut nte obio ọyọhọde ye ndem ye mme okpono-ndem. Owo ama ọdọhọ ete ke emem ndikut ndem ke Athens akan ndikut owo. Kpukpru usen Paul aka ke Ebiet-ukpono mme Jew ye ke mme urua mmọ etiñ ọnọ mme owo abaña Jesus.

Obot Mars

Mme owo edu ke mkpaidem. Nso idi emi Paul etiñde abaña esen abasi emi otode idut efen? Nso ke owo emi oyom nditiñ?” ekese edọhọ. Eketie nte ikọ Paul ikowọrọke nkpọ, ikpikpu, ndisime ikọ! Nso idi obufa ukpep-nkpọ emi, Paul? Afo ada oruk “isen nkpọ emi etiñ esin nnyin ke utọñ.”

Mme owo oro ema ebieren ndida enye nka Obot Mars, emi ekedide nkpọn nkan esop ke Areopagus, ekemen Paul eka man nta-ifiok ke Greece ekpebup enye mbume. Ntre ke Paul ada ke ufot mme ọfiok nkpọ ọdọhọ ete “Nte nsañade mbe, --- nkut itie uwa kiet, --- EMI ENYENE ABASI EMI OWO MIFIQKKE.” Enye ekedi nditiñ nno mmọ mbaña kpa Abasi oro— Abasi emi okobotde ererimbot ye kpukpru se idude ke esit. Nte akanam mmọ ikopke ibaña Abasi emi miduñke ke mme Itie-ukpono eke ubok owo enamde? Ikanaha nte mmọ ekere ete ke Abasi ebiet gold, Silver mme ndem itiat eke owo ọsọide. Paul etiñ ete ke ini odu emi Abasi mikesehe, ndusuk ọkoyode ndisime oro, edi idighe ntre aba; Abasi owuk ete kpukpru owo ke kpukpru ebiet ekabare esit. Ekem Paul etiñ ọnọ mmọ ntak emi anade nte mmọ ekabare esit ekpọñ ndiọi nkpọ mmọ: Koro Abasi omonim usen eke Jesus edifiakde edi ke ererimbot ndikpe ikpe mme owo ke abaña edinam mmọ ke ererimbot. Abasi akanam Jesus eset ke mkpa man edi Andinyaña mmọ, nko Ọbọñ “iyomke usuñ ye baba nnyin owo kiet.” (Utom Mme Apostle 17:27), edi se Paul ọkọdọhọde. Edieke ọsọñde ndikut Ọbọñ itoho koro Enye oyomde usuñ ọkpọñ nnyin edi oto ke ntak

edu-uwem nnyin emi oyomde usuñ ọkpọn Enye. Enye kebebet ete anam idiok akabare onyũ afiak etiene Imo ọbọ edidahado-nno.

Mme Asak Nsahi

Nte mbio Athens ema enim mme ikọ Paul emi ke akpanikọ? Ndusuk owo ema esak ke abañã mbuk ediset Jesus ke mkpa. Tim kere nte mme owo emiomde enyũ esakde akpanikọ emi abañãde eriset ke mkpa, emi edide idorenyin mme anditiene-Christ! Paul ekewet ete, “Edieke mikanamke Christ eset, mbuotidem mbufo ọwọrọ ikpikpu (1 Nwede Corinth 15:17). Mmọ eken edọhọ Paul afiak edi usen efen ke ekeme ndidi iyenyene inem.

Ndusuk owo ekere ete ke nte ifiok mmọ ke abañã Ọbọn ye Eti-mbuk ekpride, ntre ñko ke idinyene esisit ndiborọ mbaña. Ndusuk mkparawa iren ye iban ekere ete ke ọfọn mmọ nditre ndika ke ufok Abasi, man mmọ ekuborọ ñkpọ ebaña akwa ifiok mme uñwana eke abañãde ikọ Abasi. Edi akpanikọ ete ke mmọ enyene ndiborọ mbaña mme akpanikọ emi edude ke ofuri ikọ Abasi koro mme akpanikọ emi edu. Eyak nnyin ikpeme man nnyin ekutaba ifet ndikop nnyũ mkpep mbaña Ọbọn koro baba ntak kiet iduhe eke edimende ubierikpe Abasi ifep ke akwa usen oro.

Suk ekpri ibat owo ifañ ekenim mme ikọ Paul ke akpanikọ ke abañã Jesus, nnyin inyũ ikot mme ikọ mfuhọ, “Ntem ke Paul ọwọrọ ọkpọn mmọ.”

Usen ke edi emi Christ edisakde mmọ emi ekesinde ikot Abasi. “Ami ñko nyesak ke ini nnan enyin mbufo: nyenyũ mbaña ke ini ndik anamde mbufo” (Mme Nke 1:26). Usen oro Paul eketiñde abañã: emi Abasi osiode onim eke Enye edikpede ikpe mme owo ke ererimbot abañã mme idiok-ñkpọ mmọ: Usen oro ke edi. Ke usen oro idighe mbio Athens, Greece, ye mbon Thessalonica ye Berea ikpọn mmidinyeneke mfaña ndinọ edi ediwak mme owo ke ofuri ererimbot idisioroke uyo ke iso Edinen Ebierikpe. Ema etiñ Eti-mbuk enọ mmọ edi mmọ ikatatke esit mmọ man ebọ. Yak Abasi añwam nnyin ndinyene utọn eke ikopde ye esit eke inyimede mbuk Jesus ye ima Esie.

MME MBUME

1. Nso ikedi ukot ukwọrọ-ikọ Paul?
2. Tiñ nte mme Jew emi edude ke Thessalonica ekenemede ñkpọ ye Paul.
3. Nso ke Paul akanam ke ini Enye osimde Athens?
4. Nso enyiñ ke ekekot Paul ke Athens?
5. Tiñ baña ukwọrọ-ikọ ke Obot Mars.
6. Nso ikedi Obot Mars
7. Nso mbet ibiọnọ ukpono edisọi ñkpọ O-gold, Silver ye itiat?
8. Nte mme owo oro ema enim mme ikọ Paul ke abañã eriset ke mkpa Christ ke akpanikọ?
9. Nso ke Paul etiñ abañã edinim eriset ke mkpa ke akpanikọ.
10. Nso ke eriset ke mkpa Christ ọwọrọ ọnọ nnyin mfin emi?